



Obraćanje

rektora Univerziteta u Sarajevu, prof. dr. Rifata Škrijelja,

u povodu otvaranja parka u Kampusu Univerziteta u Sarajevu i izložbe idejnih rješenja
rekonstrukcije objekta stare kotlovnice,

Sarajevo, 23. 09. 2022.

Sa izuzetnim zadovoljstvom vas pozdravljam danas na svečanosti otvaranja parka u Kampusu Univerziteta u Sarajevu koju smo nazvali „Univerzitet u parku“. Na samom početku želim istaći i naglasiti da je za mene kao rektora Univerziteta u Sarajevu ovo veoma značajan trenutak kako zbog svoje stvarne vrijednosti tako i zbog svog simboličkog sadržaja. Kada sam 2016 započeo svoj rektorski mandat realnost ovog prostora na kojem smo se danas okupili bio je krajnje neprihvatljiv i neugodan ambijent uništene infrastrukture i zapuštenog prostora u potpunoj suprotnosti sa poimanjem urbanog i univerzitetskog prostora i zajednice. Danas se nalazimo u samom središtu jednog uređenog prostora zasnovanog na arhitektonsko urbanističkom rješenju naših stručnjaka i osnovnom konceptu prostorne organizacije koji je vođen principom, ne parka u Univerzitetu, već Univerziteta u parku. U ovom konceptu vodimo se idejom zaštite postojećeg zelenila i već razvijene pejzažne forme i veze sa postojećim kontekstom. Ovo je, izvan svake sumnje stvarna vrijednost, ovog današnjeg trenutka i ispunjen sam ponosom što će vrijeme koje sam proveo služeći kao rektor Univerziteta biti obilježeno ovim nadasve konkretnim i svima vidljivim postignućem. S druge strane, tu je i simbolički značaj današnjeg čina koji se svodi na to da je ovaj park na jedan način zapravo simbol mnogih procesa, ne toliko vidljivih javnosti, koje vodimo na Univerzitetu, a čija je polazna tačka, u prenesenom značenju, bila slična ovom prostoru koji sam 2016. godine zatekao u našem Kampusu. Kao što smo uredili park, tako uređujemo i druge procese koji

su od strateškog značaja za održivi razvoj Univerziteta u Sarajevu. Budite uvjereni da će, poput ovog parka, i Univerzitet u cjelini biti ostvarenje vizija i znanja ljudi koji su iskreno posvećeni Univerzitetu u Sarajevu na dobrobit svih njegovih studentata i profesora.

Sada se želim dodatno osvrnuti na nekoliko činjenica vezanih za park. Sporazumom iz decembra 2021. godine, potpisanim između Razvojnog programa Ujedinjenih nacija i Univerziteta u Sarajevu, o realizaciji projekta „Uređenja zelenih i sportskih površina u Kampusu Univerziteta u Sarajevu” , započete su aktivnosti na uređenju Kampusa. Samo uređenje ovog Parka predstavlja drugu fazu projekta, koja je uslijedila nakon što su početkom godine završeni poslovi čišćenja zapadnog dijela Kampusa i uklanjanja 6 ruševnih objekata, koji su predstavljali opasnost za prolaznike i stanovnike okolnih naselja.

“Univerzitet u parku” svojom organizacijom i namjenom prostora okupit će studente, profesore, sportiste, umjetnike, naše susjede iz lokalne zajednice, kao i slučajne prolaznike te im ponuditi mjesto za lični razvoj, obrazovanje, socijalizaciju, sport i rekreaciju. Svima su na raspolaganju sadržaji koji su bili predviđeni projektnim zadatkom – osvijetljene pješačke staze sa klupama i kantama za otpatke, tematski tretirane površine sa posebno dizajniranim urbanim mobilijarom, kao i trim staza za trčanje duž cijelog parka.

Naravno, sve navedeno bilo bi teško postići da nije bilo dobre volje, kvalitetne koordinacije i zajedničkog rada svih institucija i pojedinaca koji su se krajnje nesebično angažovali na ovom projektu. Ovom prilikom zahvaljujem se predstavnicima i radnicima kompanija koje su projektovale, izvele radove i vršile nadzor nad izvođenjem radova, zahvaljujem se Radnoj grupi koju čine predstavnici Zavoda za izgradnju KS, Općine Novo Sarajevo, Razvojnog programa Ujedinjenih nacija i Direkcije za izgradnju i održavanje Kampusa, čiji zadatak je bio da pored redovnog, zakonom predviđenog nadzora nad izvođenjem radova, vrše i monitoring realizaciju projekta i investitorski nadzor. Zahvaljujem Vladi Kantona Sarajevo, Općini Novo Sarajevo i Razvojnem programu Ujedinjenih nacija, koji su dali podršku cjelokupnom projektu. Ponovo ističem da je na ovom projektu ostvarena izvanredna saradnja između svih učesnika, što je jasan

pokazatelj da postoji spremnost svih aktera da se uključe i osiguraju da moderni Kampus Univerziteta u Sarajevu postane stvarnost. Decenijama se o podizanju modernog univerzitetskog centra razgovaralo, ali ovi radovi predstavljaju konkretan iskorak pomenutih učesnika na putu ostvarenja ovog generacijskog poduhvata, čiji vrhunac će biti novi i moderni Kampus Univerziteta u Sarajevu – izgrađen na ponos naših profesora i studentata, građana i građanki Sarajeva i Bosne i Hercegovine.

Hvala vam!